

皇清經解續編卷五百九十二

南菁書院

春秋左氏傳補注八

吳沈欽韓文起著

襄公

二十_{四年}經八月癸巳朔日有食之元志大衍云不應頻食在誤

條今厯推之交分不協不應食大衍說是

傳范宣子逆之聘禮賓至近郊君使卿朝服用束帛勞

象有齒以焚其身御覽異物志曰俗傳象牙歲晚猶愛惜之

掘地而藏之人欲取當作假牙往易之覺則不藏沈懷遠南越

志曰不爾窮其主乃得已也服讀焚爲僨先師所傳有齒焚身

職是故爾

已皆乘乘車杜預云乘車安車案曲禮注安車坐乘若今小

車也疏云古者乘四馬之車立乘此臣既老故乘一馬小車坐乘也庾蔚之云漢世駕一馬而坐乘漢書田千秋傳年老得乘小車入宮殿中故因號曰車丞相晉書輿服志三公九卿以下法出皆大車立乘駕駟他出乘安車其去位致仕告老賜安車駟馬蓋自漢晉以來始有安車猶以優老爲義古人則男子無安車皆立乘也惟婦人得坐乘曲禮云婦人不立乘則男子立乘矣巾車職注云婦人皆坐乘是也此張輔二子受命致師旣非蒲輪之典又殊輜輶之義何乃謬以高車目爲輜輪乎廣車是長轂衝陣之車乘車自其所常乘者耳

踞轉而鼓琴

傳遜曰轉當爲軫惠云文選注引許慎淮南注

曰軫轉也或是古軫字有作轉耳方言軫謂之枕郭璞曰車後

橫木

不在程鄭序卦曰升而不已必困言君子居安思危有知臨之道程鄭小人也不足以及此直是器小祿薄故有陰陽之患

二十五年

傳風隕妻

惠云兌爲少女故曰妻大過本末弱故風隕

妻

所恃傷也惠氏周易述云三承四二變體艮爲石故困于石下乘二剛二體坎爲蒺藜非所據而據故據于蒺藜初至四有未濟象故往不濟

無所歸也虞翻曰巽爲入二動艮爲宮兌爲妻謂上无應也三在陰下離象毀德隱在坤中死期將至故不見其妻凶也

驟如崔氏

禮運諸侯非問疾弔喪而入諸臣之家是謂君臣

爲謔

不爲崔子其無冠乎言棠姜總不爲崔子之妻何患於無冠
賜人今在崔子之宮適可費崔子之冠

陪臣干掇詩傳干扞也說文掇夜戒守有所擊也案漢書李
廣傳擊刁斗自衛李衛公兵法每夜巡探行者敲弓一下坐者
叩稍三下方擲軍號以相應皆干掇之謂也

而焉得亡之晏子語分兩節上言君非以社稷自取其死任
社稷臣者不當從死也此言崔氏自積凶惡戕君晏子又無用
以崔氏而死亡杜預言見待無異於眾臣故不死其難如是則
晏子反成怨望忠義之道喪矣

將庸何歸言此豈平常時云何遂歸

閭邱嬰以帷縛其妻而載之 婦人乘車本有帷裳氓詩淇水

湯湯漸車帷裳所謂輜輶之蔽今此倉卒逃難非復常度直以

帷縛藏妻而置車中說文縛白鮮色借爲卷義

潘錫爵按說文縛束也从糸專

聲符鑷切縛白鮮色也从糸專聲持沈切兩字迥別今傳文作縛不當以从專之縛釋之

崔氏側莊公於北郭 士冠禮注側猶特也無偶曰側吳語側

席而坐韋昭注同特牲饋食禮注側殺殺一牲也昏禮注側尊

亦言無元酒此莊公之殯則謂有棺無槨也杜預全不知訓故

不蹕 大司寇職凡邦之大事使其屬蹕士師職大喪亦如之

下車七乘不以兵甲 下車謂納壙中者也服云下車遣車也

以路車等皆不納壙送形而往迎精而反惟遣車實壙故服以

遣車當之既夕禮陳明器用器有弓矢之等役器有甲冑干笮

是本有兵甲也

自六正五吏三十帥董遇云一正有五吏爲三十帥之長案五吏每卿之下五大夫也三十帥者與帥屬於軍將者也杜預謂五吏文職三十帥武職案唐時雖有武冠猶不分文武之職酷吏傳所云文吏者習文法之事若功曹五官掾史等武吏者劾捕之事若督盜賊游擊等何武傳問文吏必於儒者論衡程材篇儒生能爲文吏之事文吏不能立儒生之學彼之文吏正與儒生相反非後世所謂文職也自三國鼎峙其爲軍主督將老死士伍遂有文武之判擬漢制且不當況周世乎

晉侯許之趙汭曰傳見晉失盟主之義杜預云齊有喪師自宜退曾不思齊之喪由誰致之有弑君之賊而猶援有喪退師

之例不通莫甚

當陳隧者井堙木刊 淮南兵略隧路亟行輜治賦文均處軍
輯井竈通此司空之官也注隧道也司馬法仁本篇布令於軍
曰入罪人之地無毀土功無伐林木當陳隧者謂下營之處
與子產親御諸門 御與禦圉並通廣雅釋詁禦止也管子書
禁禦之字皆作圉

陳侯免擁社 免則肉袒也擁社主示將戮于社

拜陳之功 言鄭假晉命得成功故拜謝

表澶鹵 廣雅釋詁澶漬也詩箋渥澶漬也言斥鹵之地多沾
漬故賈逵轉訓澶鹵也

數疆潦 管子地員篇亦壚厯疆肥注厯疏也疆堅也又云五

恣之狀廩焉如塹注塹猶疆草人職疆槩用蕢鄭云疆槩疆堅者與管子義同此疆潦謂土性剛硬受水則潦今直隸山東處猶然字當從疆加土者誤通典屯田制云土軟處每一頃五十畝配牛一頭疆硬處一頃二十畝配牛一頭是也杜預作疆界解非也齊民要術崔寔四民月令曰正月地氣上騰土長冒櫛陳根可拔汜勝之書啄櫛木長尺二寸埋尺見其急菑疆土黑壚之田

規偃豬 周禮宮人職爲其井匱鄭云匱豬謂雷下之池受畜水而流之者案孔傳水所渟曰潏此亦謂潏水之處作陽以受之偃陽字皆通用後漢書董卓傳僞立陽以爲捕魚注云續漢書陽字作堰其字義同但異體耳

井衍沃 賈逵曰下平曰衍有漑曰沃山林之地九夫爲度九
度而當一井也藪澤之地九夫爲鳩八鳩而當一井京陵之地
九夫爲辨七辨而當一井洹鹵之地九夫爲表六表而當一井
彊潦之地九夫爲數五數而當一井偃豬之地九夫爲規四規
而當一井原防之地九夫爲町三町而當一井隰皋之地九夫
爲牧二牧而當一井衍沃之地畝百爲夫九夫爲井案賈氏此
條約九等之大數非眞受田有此制也孔疏祇以杜預不用遂
執周禮授田不過三而當一不得有九當一此其蔽也案管子
地員云九州之土爲九十物凡上土三十物中土三十物下土
三十物若管子之言其別土分類更廣矣監儒少見多怪又以
爲何如也

隱於短牆以射之 短牆睥睨也或是羊馬城

二十六年經衛侯衎復歸於衛 杜預謂名與不名無義例非也如

此則春秋之義又安賴蓋其出也淹恤在外十餘年而不蒙憐
思其入也啗人以利使橫屍而已享其位始終不足取則亦名
之而已矣張洽曰名衎與衛侯鄭殺叔武公子瑕名之同義

傳領之而已 說文引傳作領此俗師所改一切經音義廣雅

領搖也謂搖其頭也今江南謂領納搖頭爲領繆亦謂笑人爲

領酌列子湯問篇巧夫領其頤則歌合律釋文領猶搖頭也素

問至真要大論注領頰車前牙之下也非此義 潘錫爵按說文

金聲五感切領面黃也从頁含聲胡咸切二字音同而義各別

鄭先宋不失所也 按趙武以逼公而不書名其下則不嫌於

逼公而向戌以不及期自不書名鄭既不嫌於逼公又不失所
故經獨書鄭良霄劉敞云此傳皆不足信莫曉其不信之田

賦轡之柔矣 見周書太子晉解

美而很 莊子漁父釋文云見過不更聞諫愈甚謂之很水經
注沔水篇有很子惠云惡而婉內惡而外婉也美而很內美而
外很也

夫不惡女乎 夫讀如曲禮若夫之夫釋文音扶非

聒而與之語 莊子天下篇強聒而不舍楚詞疾世注多聲亂
耳爲聒字林聒喧語也

左師見夫人之步馬者 廣韻步馬習馬孫愐按左傳左師見
夫人之步馬字不從馬按周禮廋人職教駢攻駒注教駢始乘

習之也今俗謂之溜馬亦曰壓馬

班荆相與食

周語注班分也言披分荆棘卽坐晏子諫篇塞

草而坐之杜預注云朋友世親按潛夫論交際篇人惟舊器惟

新昆弟世疏朋友世親

如杞梓皮革

陸機疏杞柳屬也生水傍樹如柳葉麤而白色

木理微赤故今人以爲車轂今其北淇水傍魯國泰山汶水邊

純杞也趙岐孟子注杞柳柜柳也

加膳則飫賜

此飫字當爲餽陳氏毛詩稽古編曰餽飽也乙

席切左傳飫賜杜解飫爲饜唐韻亦云飫飽也後儒相承竟以

飫代餽而飫則亡其義餽則并亡其字矣欽韓案集韻九御飫

依據切說文燕食也又餽說文飽也民祭祝曰厭餽唐韻雖失

之集韻仍自分明陳氏未考也

欒范易行以誘之 賈鄭皆讀易爲變易之易賈以行爲道欒

爲將范爲佐二人分中軍別將之欲使欒與范易道令范先誘
楚欒以良卒從而擊之鄭爲易行中軍與上下軍易卒伍也中
軍之卒良故易之按鄭說是也以中軍羸兵誘之而萃精卒於
上下軍故傳曰中行二卻必克二穆也

以比叔向 陸粲曰令其祿秩比叔向叔向上大夫蓋以上大
夫處伍舉

王使請事 聘禮及竟君使士請事注請猶問也問所爲來之
故也蓋主國雖知其爲聘來猶不敢必賓事之有無或有他故
來也故聘享成禮後經又云若有言則以束帛如享禮記云若

有故則卒聘束帛加書將命主人使人與客讀諸門外是也擯者猶必復請故經云擯者出請事賓告事畢然則主國之請事有二一是士請事於境一是擯請事於廟門之次也此傳王使請事則已行聘訖擯者請事於次也

二十七年經冬十有二月乙亥朔日有食之元志姜氏云乙亥朔交分入限應食大衍同今歷推之是歲十一月乙亥朔加時在晝交分初日八百二十五分入食限

傳叔孫與慶封食聘禮大夫於賓壹饗壹食

公喪之如稅服終身服云衰麻已除日月已過乃聞喪而服是爲稅服稅服服之輕者然所謂追服不知施於何人杜以稅爲總或是也喪服總衰裳牡麻經旣葬除之檀弓請總衰而環

經則總衰服之至輕者同於弔服故鄭注云總衰小功之縷而四升半之衰環經弔服之經又注喪服云凡布細而疏者謂之總今南陽有鄧總然杜預言喪子鮮者非也子鮮見存安可預服當是感子鮮之去痛甯子之亡爲總衰之弔服於情未慊故特用總衰非常之服以報橫死之枉以志畢生之痛亦人心所宜有也

惟卿備百邑 坊記疏熊安生曰卿備百邑者鄭志以爲邑方二里與百乘別論語皇侃義疏云舊說五等之臣其采地亦爲三等各依其君國十分爲之上公地方五百里其臣大采方五十里中采方二十五里小采方十二里半侯方四百里其臣大采方四十里中采方二十里小采方十里伯方三百里其臣大

采方三十里中采方十五里小采方七里半子方二百里其臣
大采方二十里中采方十里小采方五里男方百里其臣大采
方十里中采方五里小采方二里半凡制地方一里爲井井有
三家若方二里半有方一里者六又方半里者一則合十八家
有餘故論語云十室之邑也其中大小各隨其君故或有三百
戶是方十里者一或有千室是方十里者三有餘也按此傳祇
論邑不論乘杜預以一乘爲邑欲配百乘之數非也從祖果堂
先生周官祿田考云上公之孤食都卿食縣下大夫食甸上士
食邱中士食邑下士與庶人在官者食井侯伯之卿大夫士食
如公之國也何以知之曰典命稱侯伯之卿大夫士其命數皆
如公國其祿則亦皆如公之國也衛免餘云惟卿備百邑鄭志

以爲邑方二里是百邑卽方二十里之縣也

若計其地則三分去一田止六十四

邑若百邑皆田則是縣之有加田者俱卿所食也加田者見司勳謂田加于賞地也四十里者極于五十里二十里者極于二十五里皆八分采地之邊數以其一爲旁加之數也

易訟卦邑三百戶鄭注云小國之下

大夫采地方一成其定稅三百家

見坊記疏小當作大

成去三之一卽甸

也

以藩爲軍

韋昭注藩籬落也不設壘壁六韜軍用篇山林野

居結虎落柴營漢書鼂錯傳注鄭氏曰虎落者外藩也若今時

竹虎落也

食言者不病非子之患也

此與上當作一意讀之言不信者

必不捷彼食言者不自以爲病然終於不捷豈能爲患杜解不

了